

Zeitschrift:	Igl Ischi : organ della Romania (Societat de Students Romontschs)
Herausgeber:	Romania (Societat de Students Romontschs)
Band:	60 (1975)
Heft:	5
Artikel:	Davart l'ideologia dalla libertad ella historiografia grischuna
Autor:	Deplazes, Lotar
DOI:	https://doi.org/10.5169/seals-882400

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Davart l'ideologia dalla libertad ella historiografia grischuna

da Lotar Deplazes

Entgins aspects dil criticar historiografia

La societad moderna renfatscha alla scienzia historica representativa duas tendenzas cuntradictorias: in cert narcissem, la fuigia dalla problematica actuala en in'actividad estetica, e da l'autra vart igl abus politic cun arguments historicis. Ina critica per part bein giustificada! L'immensa tragedia dallas duas uiaras mundialas ha smesau la prestaziun historiografica dil secul vargau e discuvretg tendenzas e mentalitads prigulusas: il positivissem che fa crer ch'in progress scientific-historic seigi mo pusseivels entras perscrutar novas fontaunas e cumular ils facts; l'ideologisaziun politica e religiusa; ils egliers dil naziunalissem; il pugn da vesta memia exclusiv-politic, che fa nus tschochs ed indifferents viers la malgiustia sociala; igl entusiassem per las victorias dils babuns sin camp da battaglia e.a.v.

L'attacca ha provocau reacziuns fetg differentas. Ella sociologia e politologia dat ei perfin tendenzas da snegar l'autonomia dalla scienzia historica. Quei semanifestescha en moda extrema ella Germania occidentala, nua ch'il rom historia ei vegnius strihaus en plirs uraris da scola ed integraus el niev rom sociologia. Mo ils historiografs ein buca stai culs mauns a calun. La critica ha provocau ina profunda e nizeivla crisa, sfurzond da far gl'examen da cunscienza arisguard tematica, metodica e teoria.¹ Ils resultats principals: il historiograf ei daventaus pli mudests, gl'optimissem concernent il senn, nez e progress dalla historiografia ei tschessaus; buca mo il disdir dils scienziai, era ils tiarms immanents dil capir historiamein ein semussai pli clar.² Fundamentalala ei la scuvretga filosofica che mintga pareri scientific sur dil carstgaun valetescha era quel che dat giu il pareri, che subject ed object selain buca separar dil tut. Mintga subject ha ina concepziun dil mund formada d'elements individuals e collectivs: dil

¹ Mira p.ex.: Faber, K.-G., Theorie der Geschichtswissenschaft, Beck'sche Schwarze Reihe, Bd. 78, München 1971. – Geschichtswissenschaft in Deutschland, Beck'sche Schwarze Reihe, Bd. 111, München 1974.

² Quei ha p.ex. in historicher engles formulau en moda pregnanta e spiritusa: Carr, E.H., Was ist Geschichte?, Urban-Bücher 67, Stuttgart 1969.

talent e dalla experienza dalla veta e dil clima cultural dil temps. Sch'ins crei che la concepziun historica dil singul e dalla communidad influenze-schi nies far e demanar sin intschess cultural, politic ed economic, ha ei num analisar adina puspei ils resultats dalla historiografia e confruntar els cun las fontaunas dil temps, e quei buca mo el senn positivistic, pia currigend errurs d'interpretaziun da singuls facts e connex, mobein analisond il spért dall'epoca che ha influenzau il scribent senza ch'el seigi per-tscharts da quei. Mintga historiograf critics enviers sesez ei buca sur-staus, che sia laver daventa la preda d'ina tala analisa. Mo tgei senn, ston ins dumandar, ha la metoda historica, sche era la critica ei necessaria-mein subjectiva e muossa la noda dil spért dall'epoca, veseivla dil tut pér als vegnentsuenter? Mitschar ord la perschun da quei cerchel vizius pon ins buc, mo en principi reussescha ei da controllar el empau reflectond continuadamein la relatividad da tutta capientscha historica. L'analisa dall'interdependenza denter il clima misterius dil temps e la reflexiun historica el vargau havess negin senn sch'il historiograf perdess tutta speronza d'influenzar cheutras il spért dil temps present. La segirtad ei stulida, mo buca la speronza. Aschia vul il historiograf per exemplu analisar ideologias che sepresentan sco sistems scientifics e transparents, ferton ch'ellas cuntegnan elements irraziunals e mitus, simbols per modas e manieras da veser e secuntener. Il daventar per-tscharts dall'irraziunalidad fa pusseivla ina decisiun pli libra e persunala. Cun mudesta mira astgan ins era empruar quei sigl intschess dalla historia locala. Nus sespruein d'analisar in tec duas tendenzas ideologicas dalla historiografia grischuna.³

L'optica antiaustriaca

Ella ovra la pli representativa dalla historiografia grischuna lai F. Pieth ne-scher las treis Ligias reticas ord il quitau per la pasch publica. Sper interess parzials da purs e signurs ha questa nobla finamira bein giu muntada decisiva. Mo in patertgar naziunalistic dil historiograf ha schau constatar memia pauc il disturbader dalla pasch el ravugl dallas Ligias. Tenor Pieth ei la Ligia dalla casa da Diu vegnida serrada

³ Sco il redactur digl «Ischi semestril», Norbert Berther, ha stimulau, fetschel jeu diever d'in pér resultats da mia dissertaziun: Reichsdienste und Kaiserprivilegien der Churer Bischöfe von Ludwig dem Bayern bis Sigmund, 101. Jahresbericht der Historisch-Antiquarischen Gesellschaft von Graubünden, Chur 1973. (cita: Reichsdienste)

«1367 enteifer il territori diocesan da Cuera che era en prighel da curdar tier al stat territorial austriac. Iis ducas d'Austria havevan acquistau 1363 il Tirol e cuort suenter era il Vorarlberg. Quei ei stau in factum zun impurtont per il futur Grischun. Iis intschess al confin encunter mesanotg e damaun ein curdai ella sfera dall'expansiu austriaca. Pli da detschiert che tochen da cheu sespruavan ussa iis da Habsburg d'occupar la sedia episcopala cun umens che gudevan lur confidonna. Aschia speravan els da ligiar il territori digl uestg empau allaga senza cumbat vid l'Austria e da reconquistar da cheu ano ils territoris confederali ch'els havevan piars. Quels dalla Casa da Diu ein sesalzai encunter talas tendenzas».⁴

Semegliontamein descriva il novissim cumpendi dalla historiografia svizra la fundaziun dalla Ligia punctuond che gl'uestg eri dapi 1360 en allianza cun l'Austria «che haveva gest suenter il Comitat tiroles era acquistau il Vorarlberg (1363)».⁵ Ed in artechel ella pressa grischuna che celebrescha 1967 il giubileum da 600 onns dalla Ligia supprima schizun il «cuort suenter»:

«Il prighel ei ton pli gronds, essend che era il Vorarlberg e Tirol crodan 1363 agl imperi habsburgic. Quels dalla casa da Diu sesentan smanatschai dil nord e digl ost e seligian encunter igl exponent dalla politica proaustriaca el Grischun, encunter gl'uestg Peter».⁶

Enconuschentamein ha la contessa Margreta Maultasch surdau 1363 il Comitat tiroles al duca Rudolf IV de Habsburg. Mo il Vorarlberg era el temps medieval insumma negina unitad territoriala che saveva daventar tuttenina la preda dall'expansiu austriaca. Quei intschess cumpigliava differents segneradis. L'Austria ha acquistau 1363 mo il casti ed il pign segneradi da Neuburg sper il Rein, 1375/1390 suonda il comitat Montfort-Feldkirch, 1394/1418 Bludenz e Montafon, e pér 1523 ei il Vorarlberg davenaus ina provinza austriaca compacta.⁷

Criticar mo in sempel sbagli da datum cun tons plaids, gliez fuss fatg da sabiut! L'errur daventa relevonta el context. Ella nescha ord la tendenza antiaustriaca che dominescha il maletg historic-patriotic dil pievel grischun. Ins vesa ell'Austria il permanent inimitg mortal che smanatscha da supprimer la veglia libertad retica. La realitat historica vegn sfalsificada – buca sapientivamein – per saver crear in inimitg che circumdat silmeins

⁴ Pieth, F., Bündner Geschichte, Chur 1945, p. 76.

⁵ Handbuch der Schweizer Geschichte, Bd. I, Zürich 1972, p. 286.

⁶ «Bündner Tagblatt» dils 30 da schaner 1967.

⁷ Geschichte der deutschen Länder, «Territorien-Plötz», Bd. I, hg. v. G.W. Sante, Würzburg 1964, p. 748 ss. – Handb. d. Schw. Gesch., op. cit., p. 244.

da duas varts la cara patria. Ils babuns stattan si valerusamein e defendan lur independenza. Ins s'identifichescha cun ils heroxs dalla historia e dat fem d'entscheins a sesez. Nutrius vegn aschia il sentiment prigulus d'esser in pievel liber, valerus e favorisau dalla divina Providentscha. Quei sentiment sa influenzar nies patertgar politic. L'Austria ei gie mo in representant per gl'exterior, surtut per nos stats vischins. Ei retracta tuttavia buca d'in cass singular ella historiografia grischuna. Silmeins in per exempels vegnan aunc allegai egl artechel present. L'optica antiaustriaca ei stinada e sistematica. Nus constatein in'ideologia dalla libertad ed independenza che sa promover l'isolaziun dalla Svizra ell'Europa e la xenofobia ch'ei oz per auters motivs deplorablamein actuala.

Ins astgass buca far il pass dil Grischun alla naziun svizra sch'il connex fuss buca dil tut evidents. La ragisch da questa ideologia grischuna ei parentada cun il naziunalissem helvetic. Simtomatics para il sequent commentari ella pressa giubilara da 1967:

«A quels dalla Casa da Diu da Cuera smanatschava il medem prighel che haveva uniu ils purs confederali in tschentaner avon tier defensiun communabla: la reit dils possess austriacs tschinclava els adina pli spess».⁸

La retscherca historica ha daditg constatau che buca mo defensiun, mo-bein era agressiun ed expansiun, surtut encunter l'Austria, han scaffiu la Svizra. Ins sa buca defender quei ch'ei aunc buca creau! Quei ha era il meriteivel historiograf e fervent patriot grischun, professer Oscar Vasella, concediu.⁹ L'analisa pli critica dalla historia svizra ha fatg progress dapi la davosa uiara mundiala, e quei supren buca. Ei haveva gie buca muncau politichers e historiografs che snegavan era ils elements positivs dall'atgnadad e tradiziun culturala e politica dalla Svizra simpatisond cun Hitler che tschercava l'annecziun cun intensiva propaganda ideologica. Denter ils menaders svizzers che han opponiu al naziunalsocialissem cun l'arma d'ina ideologia naziunalistica helvetica astgan ins numnar il historiograf dall'Universitat da Turitg, professer Karl Meyer. Cun respect ed engrazievladad astgein nus Grischuns analisar il medem spért ell'ovra da Pieth scretta duront la secunda uiara mundiala, cura ch'il Tierz imperi

⁸ «Neue Zürcher Zeitung» dils 28 da schaner 1967 e «Neue Bündner Zeitung» digl 1. da fenadur 1967.

⁹ Festschrift 600 Jahre Gotteshausbund, Chur 1967, p. 71.

¹⁰ Impressiunonta ei era l'opposiziun romontscha encunter il faschissem talian che tschercava «l'integrazion linguistica e filologica e lu l'annecziun politica». Cf. Donat Cadruvi, Ils 29 de november 1934, ella «Gasetta Romontscha» dils 29 da november 1974.

tschinclava facticamein la patria – cheu vegn il plaid patria, oz empa su-spectus, puspei duvraus en moda spontana.¹⁰ In problem fundamental dalla historiografia sefa veseivels cheu. En temps dominai d'emoziuns e d'ina propaganda ideologica che vul exstirpar la naziun cun forza brutal a e suttametter il pievel alla sclavaria eis ei capeivel sch'il historiograf dat buca peisa sin verdads che periclitescan l'ideologia da defensiun. Quei vul buca dir ch'el dueigi sfalsificar sapientivamein, el dess cheutras mo arguments agl inimitg. Mo certas tendenzas sfalsificontas ein en quei connex nunevitablas. Aschia era Pieth suttaposts al clima positiv dil temps, projectond la situaziun dalla Svizra tschinclada digl imperi tudestg duront la secunda uiara mundiala egl onn 1367 e svegliond gl'entusiassem per ils babuns che han, sco el carteva, evitau ch'il segneradi digl uestg crodi al stat territorial austriac. Mo oz ha quei spért heroic d'opposiziun encunter il stat vischin piars senn e muntada. Igl ei buca mo lubiu, mobein nizeivel d'encurir da capir las fontaunas primaras senza schanetg.

Da l'autra vart – e cheu semuossa in element dispiteivel dil clima sprial d'ozildi – smanatscha il process dialectic da fierer nus en ina reacziun masohistica ni ella tendenza sarcastica. Lein turnar tier ils fatgs historicis dil temps medieval. Ei ha num differenziar. Negin sa snegar en principi la tendenza expansiva dalla pussonza territoriala austriaca. Nus pretendin mo ch'ins astgi buca exagerar e projectar ina situaziun dil 20avel el 14avel secul. Gl'acquist austriac dil Tirol 1363 ha veramein giu consequenzas per las Ligias reticas. La battaglia dalla Tgalavaina resta in factum malgrad ch'il mitus dil herox Benedetg Fontana ella historiografia e litteratura ei oz discuvretgs.¹¹ E la brev dils 25 da fenadur 1360, cun la quala gl'uestg Peter Gelyto ha dau ni vuliu dar en pègn siu territori secular ell'Austria per 8 onns, exista.¹² Denton san ins gnanc, schebein il contract ei vegnius realisaus. Capeivel che la historiografia antiaustriaca grischuna ha viu en quei document il motiv principal dils eveniments digl onn 1367 a Zernez e Cuera. Vasella ha fatg valer arguments da gronda peisa encunter questa interpretaziun. En mintga cass vegn l'Austria buca menziunada ella brev dils 29 da schaner 1367. Representants dil capitel catedral, dil marcau da Cuera, da ministerials e subdits han opponiu al signur feudal e cau diocean che surveva memia savens ella suita digl imperatur e dil duca l'Austria

¹¹ Mira Willi, C., Calvenschlacht und Benedikt Fontana, Überlieferung eines Schlachtberichtes und Entstehung und Popularisierung eines Heldenbildes, Diss. Zürich, Chur 1971.

¹² Mira per il suandont: Reichsdienste, p. 58 ss. e 67 ss.

e tralaschava l'administraziun da siu territori. Peter Gelyto, oriunds dalla Boemia e senza capientscha per la mentalitat da siu pievel subdit, vuleva alla finala retscheiver dall'Austria ina renta annuala da 1000 renschs ed il dretg da resider gratuitamein alla curia austriaca cun 12 cavals en sia disposiziun privata. Ella brev dils 29 da schaner 1367 han ils subdits pretendiu dad era saver dir in plaid en fatgs dil beinstar communal, surtut arisguard la nomina dil vicari secular che representava gl'uestg el regiment. Sentelli ch'els giavischavan ni in vicari austriac ni in auter jester ni indigen che havess smesau dretgs e privilegis dallas gruppas d'interess. Mo en quei senn relativ han ils eveniments digl onn 1367 giu denter auter era ina certa tendenza antiaustriaca, mo per bia buca schi radicala sco la historiografia representativa ha fatg valer. La Ligia dalla Casa da Diu ei pia buca naschida ord il cumbat encunter l'Austria. La brev dils 29 da schaner 1367 ha tenor miu meini insumma buca fundau la Ligia, ella ha mo promoviu siu svilup. In organ instituziunal sco la Dertgira dils XV ella brev dalla Ligia grischa (1424) ei buca vegnius scaffius. Contracts cun l'Austria e privilegis imperials han surviu sco basa dalla politica, dil dretg e dall'economia, mai vegn ei denton argumentau cun la brev da 1367 ellas fontaunas ch'ins enconuscha.

La gronda influenza dall'Austria sil stat secular digl uestg da Cuera – buca daventaus 1367, mobein empau alla ga la Ligia dalla Casa da Diu – ei pia nundiscutabla. Era ella mo negativa?

Cun raschun declara Pieth ch'ils ducas d'Austria sespruavien d'occupar la sedia episcopala cun umens che gudevan lur confidonna. Mo negin ha cumprovau tochen oz che quels adherents dall'Austria sill'a sedia episcopala hagien promoviu tendenzas habsburgicas d'annectar ni explotar lur territori.¹³

Pli cumplicadas ein las relaziuns denter il territori digl uestg e l'Austria al la fin dil 14avel ed els emprems decennis dil 15avel secul. Nus alleghein mo dus gronds conflicts che stattan en stretg connex in cun l'auter: il cumbat cun ils conts dil Tirol per dretgs e possess surtut ell'Engiadina bassa ed el Vnuost (Vintschgau) e l'uiara encunter ils ugaus da Matsch.

La damonda, a tgi certi dretgs territorials ellas treis valladas numnadas audien, era dapi tschentaners disputeivla ed ei per gronda part aunc oz buca da decider. En lavurs impurtontas ed aunc ditg fundamentalas per mintgin che vul tractar quei tema han historiografs tiroles e grischuns, surtut O. Stolz e P. Valèr, empruau meinsvart da giustificar las ovras da lur

¹³ Reichsdienste, p. 77 s.

antenats. Nus sespruein da defender la tesa che quei cumbat seigi da caratterisar sco aggressiun ed expansiun vicendeivla, perquei che la norma d'in dretg public sistematic e renconuschiu generalmein muncava al temps-miez. Igl onn 1348 ha il retg Carli IV. schenghegiau agl uestg da Cuera tuts dretgs e possess el territori dalla Dertgira da Nauders che cum-pigliava l'Engiadina bassa ed ina part dil Vnuost. El ha gnanc differenziau denter ils dretgs renconuschi nundir quels pretendi vicendeivlamein. Acceptond questa donaziun ha gl'uestg en mintga cass renconuschiu impurtonts dretgs ch'ils conts dil Tirol possedevan tochen dacheu en quella Dertgira. La donaziun ei vegnida annullada gia 1349. Malgrad quei ha gl'uestg Hartmann de Werdenberg giustificau l'expansiu ell'Engiadina bassa cun privilegis imperials, e Gion III. ha schau confirmar 1418 il retg Sigismund la donaziun annullada. Mo era als ducas d'Austria e conts dil Tirol eran tuts mieds buns avunda per contonscher lur finamira. Els han fatg diever da lur pussonza suprema e mess en perschun pliras ga gl'uestg Hartmann, in um guerril, mo capavel signur territorial.¹⁴

Tgi che vesa tuttina mo l'agressiun tirolese ed austriaca encounter la liberdad ed independenza grischuna el temps-miez sa leger la tgisa dil duca Friedrich encounter gl'uestg Gion IV., presentada alla curia papala avon ils 21 da fevrer 1421. Senza declarar l'uiara (Fehdeansage) seigi gl'uestg entraus cun si'armada el territori austriac, hagi schau incendar beins purils, destruir baselgias e mazzacrar la populaziun. Segir ei la tgisa partischonta, mo inventar fatgs aschi controllabels era strusch favoreivel. Denton sa-vein nus buca s'imaginar ch'igl uestg Gion IV., in diplomat, iurist e theolog conservativ, mo buc in um marzial, hagi stimulau ses subdits tier excess schi brutals. Mo succedida ei l'agressiun!¹⁵

L'uiara¹⁶ dils uestgs encounter ils ugaus da Matsch che exercitavan la giurisdicziun sco bratsch secular dalla baselgia ell'Engiadina, ella Val Müstair ed el Vnuost ha cuzzau cun interrupziuns da 1392 tochen 1421. Forza brutala ha regiu duront pliras fasas da quei liung conflict. Ins deplorava buca mo ils umens curdai e blessai en cuortas battaglias, gl'entir pievel piteva: casas e clavaus, gie entirs vitgs ein vegni barschai, ers e vegnas devastai, muntaneras enguladas, negoziants sblundergjai. Tgei che quei muntava per in pievel muntagnard che viveva d'ina magra economia agraria e d'entradas dil transit da rauba san ins bein s'imaginar. Quei vala mal-grad che l'uiara haveva ses aspects giavinonts, l'aggressivitat dil munta-

¹⁴ Reichsdienste, p. 243 ss.

¹⁵ Reichsdienste, p. 300 ss.

¹⁶ Mira per il suandont: Reichsdienste, cap. VIII, p. 262 ss.

gnard retenida en veta monotona haveva il basegns da seliberar en bruta la furia arcaica, e la preda sin camp da battaglia carmalava pli fetg che tuts aspects politics! La forza guerrila da ministrials e purs subdits ha bein gidau alla victoria, mo pli decisivs ein stai ils instruments dalla pasch, surtut la dertgira da cumpromiss.

Tgei instanzas han silmeins adina puspei interrutt la violenza, e tgeininas han finalmein sligiau il conflict?

Sco emprem cau d'ina dertgira da cumpromiss menziuneschan las fontaunas Hugo de Monfort (1392–93). Ins ei buca surstaus ch'el ha disgiu: al pign cont muncava l'autoritat da derschader. Mo silmeins han omisduas partidas eligiu la via nunviolenta da dretg e raschun cuort suenter ch'igl uestg haveva giu entschiet l'uiara. Suenter novas lutgas ei il sulet enconuscent process ordinari vegnius instradaus avon la dertgira feudal (Pfalzgericht) da Cuera e dirigius da Gion de Lumerins (1395). Quels da Matsch ein buca cumpari. La sentenzia ha favorisau gl'uestg. La procedura ha reteniu in tempset l'agressiun e lu giustificau l'uiara e rinforzau la loialitat dils members dalla Casa da Diu viers lur cau feudal. Mo quels da Matsch ein s'alliai cun lur parents, il cont da Toggenburg ed ils baruns da Razén che fagevan lur atgn'uiara cugl uestg. 1413 avon che passar da Cuera sur il Lucmagn ha il retg Sigismund liberau gl'uestg e ses adherents ord ina situaziun precara e sfurzau la coaliziun Matsch-Razén da serrar cumpromiss (Anlass). El ha numnau novs derschaders che han buca giu success ed ha la finala surdau il cass alla dertgira dil concil da Constanza argumentond che Hartmann de Werdenberg seigi buca mo prenci imperial mobein era cau diocesan, e perquei seigi in congress ecclesiastic cumpetents. Quei era ina stgisa. La fleivlezia dalla forza centrala digl imperi sfurzava il retg da s'engaschar en conflicts locals mo schilunsch sco els tuccavan interess alla politica imperiala ni da siu agen territori. Il retg ha promoviu la pasch ella Rezia 1413 per gudignar adherents ell'uiara encunter Milaun e per segirar ils pass che menavan tier il marcau dil concil. En moda pragmatica ha el renconuschiu pli tard la cumpetenza dil concil ch'el dominava perfin en damondas theologicas, essend che treis papas regents smesavan l'unitad dalla baselgia. Superaus il schisma, ha papa Martin V. intervegniu admonend denter auter ils ducas d'Austria da schurmegiar il territori da Cuera encunter tuts inimitgs, pia en quell'epoca surtut encunter ils ugaus da Matsch ed ils baruns da Razén. Mo adumbatten.

Quei che dertgiras e signurs feudals retics e las pli aultas autoritads spiritualas e secularas han buca contonschiu ei reussiu als ducas d'Austria ed al marcau da Turitg.

L'intermediaziun turitgesa introducida 1418 ed intensivada 1419 sin basa d'in contract (Burgrechtsvertrag) ha purtau fretgs 1421 en ina sentenzia che ha mess perina gl'uestg cun il cont de Toggenburg sco alliau dils da Matsch.

Mo ils pli gronds merets per la pasch han ils ducas Leopold, Albrecht, Friedrich ed Ernst d'Austria acquistau. L'intermediaziun sefundava sin il contract digl onn 1392 denter gl'uestg Hartmann e l'Austria. El garanteva il status quo senza liquidar las controversas tradiziunalas ed obligava las partidas da segidar vicendeivlamein favorisond empau la pussonza suprema austriaca. Ils ugaus da Matsch eran ligiai vid l'Austria sco vasals dil Comitat tiroles. Tals ligioms facilitavan buc in agir nunpartischont.

Dapi 1393 han gl'uestg ed ils ugaus da Matsch adina puspei supplicau ils ducas da presidiar dertgiras da cumpromiss. Mintgamai cu otras instanzas havevan negin success encurevan els la pasch tier l'Austria. Gnanc lur agens grevs conflicts cun il cont tiroles han pudiu impedir quei. Finalmein han il duca Ernst ed ils uestgs da Brixen e Trient dau 1421 la sentenzia che ha concludiu l'uiara: ils da Matsch han stuiu renunziar all'ugadia e han salvau mo mudests dretgs en lur Val da Matsch el Vnuost, els han cediu ils castials da Ramosch, Steinsberg e Greifenstein retschevend la summa da pègn. L'ugadia da schurmetg dalla claustra da Müstair ei curdada als ducas d'Austria.

Questa victoria digl uestg da Cuera e dalla Ligia dalla Casa da Diu ei stada da gronda muntada. Enconuschentamein era il stat feudal dil temps-miez pér sin via da daventar in'unitad giuridica e territoriala. Il domini consisteva ord la summa da possess e regals: schischom, giudicatura aulta e bassa, duana, dieschmas, taglias, tscheins e.a.v. Unir il possess spatitschau era la devisa. Ils ugaus da Matsch possedevan ils dretgs da dertgira ell'Engiadina, ella Val Müstair ed el Vnuost sco feudum hereditari. Dapi igl 11avel secul ei l'arteivladad dil feudum stada savens la basa per ereger in stat territorial, aschia per exempl el Tirol en disfavur dils uestgs da Brixen e Trient. Sco derschaders da cumpromiss han ils ducas d'Austria pia buca mo gidau a contonscher la pasch. Havend fatg persenn ch'ils dretgs da dertgira numnai seigien vegni usurpai han els stinschentau la tendenza dils da Matsch da retardar il process territorial ni schizun d'ereger in agen pign segneradi che havess smesau il territori dalla Ligia dalla Casa da Diu e cheutras silla liunga forsa era dil Grischun.

Tals aspects positivs dalla politica austriaca ein buca vegni apprezziai avunda ella historiografia grischuna. Plattner snega per exempl il grond success digl uestg e vesa il Comitat tiroles sco victur el process final, argumentond denter auter che l'ugadia da schurmetg dalla claustra da Mü-

stair seigi vegnida usurpada dall'Austria. Mo en verdad ha il convent che haveva pitiu duront l'uiara giavischau expressivamein ils ducas sco schurmegiaders da pli gronda pussonza ed autoritat. Plattner construescha schizun ina conspiraziun austriaca encunter la Ligia, pretendend che buca mo ils derschaders, mobein era gl'uestg erien tiroles. Facticamein era Gion IV. Naz oriunds dalla Boemia ed ha defendiu da detschier e per part cun success ils dretgs da siu territori. Plattner ei in tipic representant dall'optica antiaustriaca ella historiografia grischuna. Segir fuss ei naiv da crer che l'Austria e Turitg hagien intermediau per la pasch senza agen interess, els defendevan lur sferas d'influenza che cunfinavan sils pass dalla Gelgia e dall'Albula. Condemnar talas tendenzas, che astgan buca vegnir caracterisadas sco emprovas d'annecziun, fuss denton pauc realistic.

Il fatg ch'ils ducas d'Austria eran buca adina gl'inimitg dallas Ligias reticas e ch'els han perfin promoviu la pasch ed il svilup dil territori dalla Ligia dalla Casa da Diu muenta la damonda, schebein ei seigi buca necessari da reveder l'optica antiaustriaca era per la historia dils tschentaners suandonts, e quei considerond las midadas dall'influenza habsburgica mintgamai ella constellazion politica.

La libertad dils Libers da Lags

L'analisa da quei ch'ei vegniu scret sur dils Libers da Lags ei en emprema lingia in dialog cun Pieder Tuor. Als Libers ha Tuor dedicau sia dissertaziun¹⁷ che tradescha reha fantasia en clara terminologia giuridica e treis artechels publicai egl Ischi,¹⁸ paginas che astgan valer malgrad la tempra populara, sco exemplarica prosa scientifica romontscha. Legend las empremas publicaziuns surstat negin che Tuor ha fatg ina carriera briglianta da professer d'universitat ed ei daventaus in dils pli gronds giurists svizzers da siu temps.

Denton, dogmatisar quels resultats mass mal a prau cun il spért critic da Tuor. Ina nova historia dils Libers da Lags stuess sefundar per gronda part sillas fontaunas che Tuor ha interpretau l'emprema ga sistematicamein fagend diever da lavurs preparativas e stuess integrar singuls resul-

¹⁷ Die Freien von Laax, Ein Beitrag zur Verfassungs- und Standesgeschichte, Diss. Freiburg (Schweiz), Chur 1903.

¹⁸ Il Comitat de Laax, Igl Ischi 1902; V Centenari della Libertad de Laax 1428–1928, Igl Ischi 1928; Libertad svizzera e libertad grischuna, Igl Ischi 1941.

tats spatitschai ella producziun historiografica dils davos 7 decennis. Quei füss denton strusch fritgeivel senza analisar il spért dil temps che ha influenzau Tuor.

Tuor muossa generalmein la tendenza da glorificar la historia dils Libers dil vitg da si'affonza. En viarva commuentonta celebrescha el la libertad singulara dils muntagnards, mischedond arguments irraziunals e psicologics:

«La grondezia e majestad de nossas pezzas che tonschan lunsch viasi egl azur u penetreschan las neblas, lai buca nescher il sentiment della superioritat d'in carstgaun sur l'auter, mo fa parer els tuts sco ulivs habitonts dellas profundas e strengas valladas. L'isoladedad dellas casas e tegias che surveschan per habitaziun enviescha il carstgaun sin sesez, sin sia atgna forza, oblighescha el de semetter e setener sin agen pei, da sedistaccar dil concarstgaun, perfin dil vischin. La lavur dira e stunclenton en in tschespet pauc rendeivel renda quei tschespet ton pli cars e prezius al cor, endirescha senn e caracter, entschalescha il bratsch. Il combat continuau a miez ina natira selvatga e pleina de prighels fugenta tema e snavur. Aschia fuva ei sper il S. Gotthard, igl Uri-Rothstock, ils dus Mythens, il Titlis, il semegliont era sper il Badus, il Crispalt, il Tödi, il Curver, il Bernina, ellal vals della Reuss e della Muota ual tuttina sco ellas vals dil Rein, dil Glogn, della Gelgia, digl En. Ils medems motivs psicologics han cheu schendrau il medem regl de libertad, independenza ed equalitat, in regl sco el ei semussaus negliu auter el vegl imperi tudestg.»¹⁹

Il pur muntagnard sco sulet promotur dalla libertad ed equalitat: quei corrispunda strusch a certs facts nundiscutabels dalla historia. Pertgei duess la maiestad dallas pezzas haver schendrau duront tschentaners il regl da libertad – concernent la Surselva – mo ella pintga minoritat dils Libers da Lags? Ils libers Vallesans habitavan aunc pli datier dallas pezzas ch'ils Retoromans, igl origin da lur libertad ei la colonialisaziun en favur dil signur feudal. Ins sto supponer che era la libertad dils Libers da Lags sefundavi sin interess economics e politics. Quei selai buca cumprovar, ils documents mauncan. Eis ei buc evident? Pli evident ch'ina influenza schi positiva dallas pezzas sil carstgaun dil temps medieval! En purgamenas, actas e cronicas demuossa la populaziun muntagnarda sco quella dalla bassa sper moviments da libertad bia servilidad enviers signurs feudals e lur successors, ils nievaristocrats, ils privilegiai ord schinumandas meglieras famiglias che menavan il pievel buca scolau e madir per l'equalitat. La pupira ha sfurzau gest ils purs muntagnards da survir en armadas da mercenaris che han stinschentau duront tschentaners il regl

¹⁹ IgI Ischi 1941, p. 103 s.

d'independenza dils pievels e conservau sistems reacziunaris dil temps feudal ed absolutistic surtut en Tiaratudestga, ell'Italia ed en Frontscha. Nus lein nuota curdar en gl'auter extrem. El ravugl dallas Ligias e dils cumins ha era nies pievel muntagnard contribuiu al svilup democratic. Sengar quei fuss malengrazieivel. Mo che nus veglien ni buc: la societad burghesa dils marcaus ha dau ils gronds impuls el cumbat encunter il feudalissem ell'Europa. Aria dil marcau fa libers! Aschia han marcaus dalla Lombardia resistiu cun success allas grondas armadas da mercenaris dils retgs ed imperaturs tudestgs. Ella Ligia dalla Casa da Diu ha il marcau da Cuera buca battiu pli pauc per ina independenza relativa ch'ils purs dallas valladas muntagnardas.²⁰ Il medem vala per ils marcaus ella Confederaziun svizra.

Mo il scienziau Tuor ei buca secuntentaus cun in himni da libertad. El ha interpretau las fontaunas. Cheu seigien mo dus aspects intercurri empau: igl origin dil comitat da Lags e l'imurtonza dalla purgameina da liberaziun (1428).

Il comitat da Lags vegn numnaus l'emprema ga egl urbar habsburgic l'entschatta dil 14avel secul, siu origin ei aunc oz in dils pli grevs capetels dalla veglia historia grischuna. Gia avon Tuor han plirs historiografs viu in connex denter il comitat da Lags ed il comitat retic da Cuera dil temps ault-medieval, e quei surtut pervia dils cunfins pressapauc identics. Cun hipotesas impressiunontas, per part aunc oz fritgeivlas, ha Tuor punctuau la continuitad denter quels dus comitats e cumbattiu vehement la tesa da Juvalt che il retg Rudolf de Habsburg hagi scaffiu il comitat da Lags.²¹ Las scarsas fontaunas lain buca decider questa damonda. Mo igl ei evident che Tuor vul cumprovar in origin dalla libertad schi vegl sco pusseivel. Vegliadetgna dat in nimbus d'imurtonza! Sefundond sin tesas da Wyss pretenda Tuor che la communitad dils Libers hagi «saviu conservar sias preferenzas dil stan e dalla politica intactas dall'immunitad ecclesiastica e dal domini dils segneradis seculars.»²² Igl ei buca nunpusseivel che certi elements dalla libertad individuala ni politica derivan da libers digl imperi che stevan directamein sut il domini digl imperatur e vegnevan guvernai da conts, ferton che auters libers ein vegni suttamess ad uestgs ed avats entrais privilegis d'immunitad.²³ La tesa d'ina continuitad intacta ei denton

²⁰ Mira Reichsdienste, p. 215 ss.

²¹ Mira p. ex. Igl Ischi 1902, p. 113 s.

²² Tuor, Die Freien, op. cit., p. 1.

²³ Mira Clavadetscher, O.P., Das Bündnis der Rheinwaldner und Safier mit den rätsischen Freiherren vom Jahre 1360, Schw. Zeitschr. f. Gesch. 1967, p. 163.

in mitus naschius ord in'ideologia dalla libertad sco l'influenza sociala e politica dalla maiestad dallas pezzas grischunas e svizras. La libertad adina relativa che consista ord la summa da certs dretgs e privilegis personals e politics ei stada suttaposta all'evoluziun dil sistem feudal; quei muossa gia il factum ch'il comitat da Lags era all'entschatta dil 14avel secul en possess feudal dils ducas d'Austria e sil pli tard dapi 1342 dils conts de Werdenberg-Sargans.

Igl onn 1428 han ils conts de Werdenberg vendiu als Libers lur domini, surtut la giudicatura ed ils regals da duana, catscha e pesca, e quei senza menziunar ch'els possedevan il comitat sco pègn dall'Austria. Cheutras ha il comitat contonschiu la pli aulta libertad politica pusseivla el temps tard-medieval, la dependenza directa digl imperi (Reichsunmittelbarkeit). Questa liberaziun che stat en connex cun l'entrada dils Libers ella Ligia grischa 1424 ei senz'auter in impurtont eveniment historic. Nus lein buca repeter l'interpretaziun da Tuor schi lunsch sco ella vala aunc oz. Mo era cheu stuein nus constatar elements ideologics che van buc a prau cun il tenor dallas purgameinas. Tuor punctuescha sin moda extrema la cesura denter feudalissem e democrazia, ina tesa che Peter Liver ha profundau ed exagerau pli tard en sia dissertaziun per auters motivs fetg impuronta.²⁴

Ils 15 da fevrer 1434 han ils Libers surdau voluntariamein agl uestg da Cuera tut ils dretgs ch'els havevan cumprau dils conts de Werdenberg sis onns avon e han empermess da survir al niev cau feudal cun scut e lontscha sco ils auters Libers dalla Casa da Diu da Cuera.²⁵ Els motiveschan la viulta cun il basegns da schurmetg e segirezia. Quei fatg ha menau Tuor e sia idelogia dalla libertad ellas stretgas. El vul che ses Libers hagien acquistau 1428 «la compleina autonomia, l'indipendenza politica dil cumin»²⁶ per adina e sto consequentamein pretender ch'il contract da schurmetg da 1434 hagi «mo en pauc sminuiu ils dretgs e privilegis recuvrai».²⁷ El translatescha en romontsch la brev da spindrament (1428) e la confirmaziun digl imperatur Sigismund (1434)²⁸ mo buca la brev da submissiun che ha scaffiu in domini pli durabel e l'anologa confirmaziun imperiala (1434)!

²⁴ Liver, p., Vom Feudalismus zur Demokratie in den graubündnerischen Hinterrheintälern, Diss. Zürich, Chur 1929.

²⁵ Mira per il suandont: Reichsdienste, p. 250 ss.

²⁶ Igl Ischi 1902, p. 127.

²⁷ Igl Ischi 1928, p. 299.

²⁸ Igl Ischi 1928, p. 268 s.

In contract da schurmetg e l'obligaziun da survir ell'armada digl uestg va semplamein buc a prau cun cumpleina autonomia ed independenza politica ed ei nuot auter ch'ina nova curdada els latschs dil feudalism che haveva en quell'epoca sco ei para era certi vantatgs. Schurmetg e segrezia eran pli impurtants che libertad el senn d'independenza directa digl imperatur. Gie, tals vantatgs ed interess valevan era sco libertad. L'expressiun «libertad» ei fetg relativa. Iis Libers concentrati els vitgs da Lags e Sevgein e spatitschai ell'entira Surselva fuormond ina fleivla uniun persunala stuevan sedefender encunter gl'avat feudal da Mustér, las dertgiras dalla Ligia grischa e forsa era encunter novas pretensiuns dils conts de Werdenberg. El tard temps medieval era l'uniun persunala in stat conservativ, ferton che las dertgiras dalla Ligia grischa cun lur tendenza da dabantar unitads territorialas e giuridicas sesviluppavan silla via dil progress.

Tuor ha fatg scola ella historiografia grischuna. Ella publicaziun festiva digl onn 1924 pretenda G.A. Vincenz: «Da quei mument naven (1428) era la communitad dils Libers ch'eran commembers dalla Ligia grischa en possess dalla cumpleina autonomia politica, dalla giurisdicziun aulta e bassa». ²⁹ La renunzia a quella independenza sis onns pli tard vegn buca menziunada, ella mava buc a prau cun il spért optimistic e glorificont dalla fiasta centenara. Tenor Pieth³⁰ entscheiva «il liquidar las davosas restonzas dil feudalism» cun la brev da cumpra 1428. Quei ei nuota falliu, mo era Pieth senuspescha da menziunlar la submissiun dils Libers 1434, la reacciun feudala.

L'ideologia dalla libertad ell'ovra historica da Tuor ha sper la historiografia dalla svizra tudestga dil 19avel secul aunc ina ragisch specificamein sursilvana. Il «himni da libertad» suracitau ei era in affon dall'ideologia dalla «libra, libra paupradad» dil «pur suveran» da G.A. Huonder. Quei resulta dil cuntegn sco era da certas parallelas formalas. Ins cumparegli «Quei ei miu grep, quei ei miu crap, cheu tschentel jeu miu pei» cun «semetter e setener sin agen pei», ni «sai a negin marschei» cun «sedistaccar dil concarstgaun, perfin dil vischin». L'interdependenza denter historiografia e litteratura ell'epoca dalla Renaschientscha romontscha ei naturalmein in grond tema che nus savein tractar cheu mo superficialmein cun in pèr exempels. Tuor declara l'etimologia da «Lags» ed il pesc el sigil buca mo – quei ei evident – en connex cun il lag sper il vitg, el pretenda:

²⁹ Vincenz, P.A., *Der Graue Bund, Festschrift zur fünfhundertjährigen Erinnerungsfeier*, Chur 1924, p. 182.

³⁰ Bündner Geschichte, op. cit., p. 132.

«In secund motiv ch'il pesc ei vegnius elegius sco arma e sigil dils Libers po esser, ch'el vala per il simbol della libertad tenor quei che nus schein: libers sco il pesc ell'aua».³¹ Ha Tuor manegiau quei serius, ni setracta ei d'ina concessiun alla tempra populara da siu artechel? Il medem motiv entupein nus ella davosa strofa dalla poesia da G.C. Muoth, messa en musica da J. Bovet per la Fista centenara da 1928:

La libertad artada
Dal pesc en siu ual
Ei ussa propagada
Atras l'entira val.³²

Ins fuss surstaus sch'il poet da Lags Flurin Camathias havess buca celebrau la loscha historia da siu carezau vitg patern. Era auters poets laudan lur vitg cun superlativs. «In dils bials de tut la Foppa»³³ numna Gion Cadieli siu vitg Sagogn e per Alfons Tuor ei Rabius «il vitg il pli plascheivel» che schai «sin la pli biala spunda de tut la val».³⁴ Per Flurin Camathias ei Lags «la patria ventireivla»; pér «en spartgida ruasseivla» vul el encuir «la megli'ra patria».³⁵ El drama festiv per la fundaziun della Ligia grischa (1424–1924) vegn la «gruppa democratica» dils libers dallas vals renanas beneventada. Silla damonda «pertgei el uopen veis ils pescs?» rispunda Coray, mistral dils Libers da Lags:

Perquei ch'els lags senodan libramein
ils leghers pescs ch'ein a negin subdits.³⁵

Cun aunc pli loschs plaids pretenda Camathias ella poesia «Liber sur igl uaul»:

Mo mai ils Libers han sturschiu
el giuv dils jasters lur culiez.
La «Ligia sura» protegiu
ha ses commembers cun buns mieds.³⁵

Eran ils ducas de Habsburg ed ils conts de Werdenberg-Sargans buca jasters? Han ils Libers buca sturschiu lur culiez el giuv migeivel digl uestg

³¹ Igl Ischi 1928, p. 285.

³² Igl Ischi 1928, p. 267.

³³ Gasetta Romontscha dils 11 d'uost 1953.

³⁴ Steilas, La Poesia d'Alfons Tuor, ediun della Romania, Mustér 1954, p. 3.

³⁵ Flurin Camathias, Ovras, edizion festiva per il tschienavel onn de naschientscha 1871–1971, Lavur edida e commentada da A. Maissen, Cuera 1971, p. 133, 95, 132.

Gion Naz, oriunds dalla Boemia, per sedefender denter auter encunter la Ligia grischa che ha pli tard annullau ils privilegis da libertad d'ina part dils Libers, integrond quels ellas Dertgiras sco gia Tuor³⁶ haveva mussau si?

Naturalmein astga il poet far diever da temas historics senza risguardar exact ils fatgs. Mo intercurir il maletg ch'in pievel ha fatg da sia historia senza considerar il stretg connex denter litteratura e historiografia ei strusch pusseivel. Quei che resplenda en biala fuorma poetica sco els exempels allegai ei pli impressiunont ch'il stil schetg e magari lungurus dil historiograf.

Enqual lectur valetescha forsa gia in'analisa buca mo affirmativa sco critica destructiva, oz ch'il senn per la historia e per l'atgnadad romontscha va da rendiu e che la fatscha da nos vitgs e per citar Tuor «La maiestad de nossas pezzas» vegnan deplorablamein destruidas entras baghetgs e funicularas pli fetg che quei ch'il progress economic dil turissem pretenda. Denton ston l'entira tradiziun culturala ed il spért dil temps vargau mo vengnir ludai e manteni en nostalgia? Il patos el laud dalla libertad e bellezia dalla patria muntagnarda ha gidau ils Retoromans ad anflar lur identidad. Oz dat quei patos extrem sill'a gnarva surtut alla giuventetgna e smanatscha da provocar ina reacziun extrema encunter la tradiziun culturala insumma. Cun distanza viers la historia, cun egliers critics e magari cun bucca rienta vegn era il patos supportabels. Forsa sa ina critica pli intensiva che mantegn respect ed engrazievladad, evitond tutta polemica, gidar ad analisar las valurs cuzzontas e declarar e cheutras relativar il chauvinissem cultural e politic ella historiografia e litteratura dalla Rena-schientscha romontscha, da quei grond moviment ch'influenzescha aunc oz il destin dalla Romontschia el senn positiv e negativ. In tal dialog cun il vargau stuess denton ir pli profund che quei che mudests essais historicis lubeschan.

³⁶ Die Freien, op. cit., p. 151 ss.